


TEZAU LITURGIC

14 IUNIE

SLUJBA
SF. IERARH-MUCENIC
VLADIMIR
BOGOIAVLENSKI,
MITROPOLITUL
KIEVULUI
-AFLAREA MOAȘTELO-



MINEIUL PECERSKĂI-02
KIEV, 2007



Месяца иуниа в 14-й день Служба обретению мощей священномученика Владимира, митрополита Киевскаго

Вечер

Блажен муж: 1-й антифон.

На Господи, возвах: стихиры, глас 3:

Достойно ныне восхвалим, о братие, в русских новых иерарсех первомученика, веру соблюдшаго, и паству оградившаго от Христовых врагов исконных, темже возопиим ему: радуйся, святе Владимире, веры правья крепкое утверждение, и молитвенниче неусыпный о душах наших.

Достойно ныне восхвалим, о братие, в пастырех русских изряднаго Владимира, благодать архиерейства усердно восприявшаго, и обильно возрастившаго, и реку учения евангельскаго источившаго, изсохшия зловерием сердца напояющую, темже возопиим ему: святе Владимире, молитвенниче неусыпный буди о душах наших.

Достойно ныне восхвалим, о братие, заповедей евангельских рачителя мудра, убийцем и врагом христовым радоватися не глаголавшаго, своих

же убийц простивша и благословивша, первомученику Стефану поревновавшаго, ума чистотою и сердца кротостию, и произволением еже к славе небесней недвижимым, яже ныне достигл еси, святе Владимире, молитвенниче неусыпный буди о душах наших.

Слава, глас 1:

Взыграйте торжествующе, холми Киевския, и с ними вся Русь православная, умилением притецем к мощем страстотерпца новаго, и заступника нашего изряднаго Владимира, паки бо к пастве своей ныне возвратися, егоже раки демони трепещут, егоже победою отступницы посрамляются, егоже благословением вернии утешаются, егоже благосердым предстательством пред престолом Святыя Троицы вечных благ упование имамамы.

И ныне, догматик: Всемирную славу:

Вход, прокимен дне, чтения три.

На стиховне стихиры, глас 4:

Твердым твоим исповеданием врага невидимаго крепко низложил еси, кротким же пастырским словом заблуждающия вразумлял еси, во обою же верен Христови до смерти пребыл еси. Темже и нетленным венцем достойно увязался еси, священномучениче Владимире, граду Киеву

похвало и утверждение.

Стих: Священницы Твои оденуты в правду, и преподобнии Твои возрадуются.

Твердым твоим исповеданием, христоненавистным противустал еси, и Церкви разделителей посрамил еси: темже и ныне молися от соблазна вражия сохранитися нам, почитающим любовь твою, священномучениче Владимире, граду Киеву похвало и утверждение.

Стих: Блажен муж, бояйся Господа, в заповедех Его восхощет зело.

Твердым твоим исповеданием и по кончине Христа прославляеши, яко Победителя смерти и Подателя нетления, дивнаго не токмо в душах, но и в телесех святых Своих. Сие свидетельство, мощи твоя чудоточныя имуще, прославляем тя, священномучениче Владимире, граду Киеву похвало и утверждение.

Слава, глас 6:

Днесь беззаконнующи умолчаша, и ненавистницы Святыя Руси посрамишася, малое же стадо Христово дерзает, и Печерская обитель светло красуется в обретении честных мощей священномученика Владимира. Темже и мы вопием ему: даруй и нам благословение твое, отче, крест свой по Христе носить достойно и

стезею твоею шествующе неуклонно, славы небесныя с тобою улучшить.

И ныне, глас тойже:

Богородице, Ты еси лоза истинная, возрастившая нам плод живота, Тебе молимся, молися владычице, с новыми страдальцы Русскими, помиловатися душам нашим.

Тропарь, глас 2:

Веры православныя непорочный блюстителю и заповедей Христовых усердный исполнителю, священномучениче Владимире, Христа всем сердцем возлюбив, паству твою добре упасл еси, незлобиво мученическую смерть приял еси. Сего ради в вечней славе пребывая, моли спастися душам нашим.

На утрени

По 1-м стихословии седален, глас 1:

Начало крещения страшнаго, имже паки крестися земля Русская, восхвалите, о горы Киевския, крестом апостола Андрея благословенныя. Идеже бо благодать возсия роду нашему, от воды же и духа во отвержение Царствия Божия, тамо подобаше начатися и сему обновлению, кровию перевозакланнаго от святителей русских, тезоименнаго просветителю

нашему. Сей бо Владимир новый из винограда изведен за врата священныя Лавры Печерския, венчания Стефанова сподобляется, прощая и благословляя убивающих его, яко кроткий молитвенник о душах наших. Дважды.

Слава, и ныне, Богородичен:

Богородице, христианом помощнице, ускори на помощь людем безответным, премного Сына Твоего прогневавшим, и гнев Его на ся подвижшим, приклони на милость матерним Твоим дерзновением, отврати от нас прещение Его праведное.

По 2-й стихословии седален, глас 6:

Тебе, о Владимире, первосвятителю древния Киевския церкви, соименне святому просветителю Руси, подобаше предначати славное поприще борений и страданий, предводиши ты боговенчанный полк страстотерпцев, и воздается ти первый венец похвалы. Дважды.

Слава, и ныне, Богородичен:

От погибельныя бездны, от нечаяния глубины, от тмения греховнаго вопиющих к Тебе ущедри Владычице, вся бо можеша, яко заступница наша, и Мати Творца Твоего неизреченно явльшаяся.

По полиелеи седален, глас 4:
Пастыреначальнику в служении слова
поревновавый, и Агнцу от создания мира
закланному последовавый, Владимире
священнострадальче, от Негоже светло
просветился еси, темже и ныне овцы твоя
сохраняй от волков, облеченных во одежды
овчии, и от волчиих наемник соблюди
невредимы.

Слава, и ныне, Богородичен:
Кто возможет разлучити нас от богатства
милосердия Твоего, о Богомати, аще не грехи
наши, имиже отлучаем себе от любви Божия? Ты
же, Благая, не остави нас, но благодатию,
данною Ти от Бога, возведи от тли греховныя и
призови к покаянию, да сподобимся со святыми
сродники нашими жизни вечныя.

Степенна, 1-й антифон 4-го гласа.
Прокимен: Честна пред Господем смерть
преподобных Его. Стих: Что воздам Господеви о
всех, яже воздаде ми?

Евангелие от Иоанна, зачало 35 от полу.
Стихира по Евангелии, глас 6:
Днесь беззаконнующии умолчаша: (зри на
стиховне)

Канон глас 8,
егоже краегранесие сице:Первомученику во
иерарсех первое пою хваление.

Песнь 1.

Ирмос: Воду прошед яко сушу, и египетскаго зла
избежав, израильтянин вопияше: Избавителю и
Богу нашему поим.

Православия поборника крепкаго, приидите,
вернии, восхвалим ныне песньми и к мощем
цельбоносным его притекающе тепле,

Избавителю всех победную песнь воспоим.

Единого Сущаго на небесех паче всякаго страха
убоялся еси, Тому Единому всяким усердием
поработал еси, и коварствия вражия оплевав, с
Ним на веки воцарился еси.

Радости присносущныя надеждою препоясався,
терпением в подвиг страдальческий вшел еси,
темже не посрами Господь упования твоего, с
лики мученик сочета тя.

Воин Христов непобедим показался еси, противу
безбожных твердым исповеданием вооружився,
и раскольником Церкви палицею словес
святительских противустав, венцем
неувядаемым от Господа увязался еси.

Богородичен: Отроковицу безмужную, Матерь
нетленную восхвалим песньми, вернии, Тоя бо

рождеством с Богом примирихомся, и Тоя предстательством спасения чаем.

Песнь 3.

Ирмос: Небеснаго круга верхотворче Господи, и Церкви Зиждителю, Ты мене утверди в любви Твоей, желаний краю, верных утверждение, единае Человеколюбче.

Милостию ко скорбящим украсился еси, еще в начале служения твоего, раздробляюще алчущим хлеб твой, болящим же всеусердно послужил еси словом пастырским, молитвою и увещанием.

Устрашити не возможе тя, отче Владимире, прелестник страхом язвы моровья, и запяти тя в служении твоём страждущим, никогоже бо возгнушался еси от меньших братьий твоих.

Чувственною язвою пораженным страдания облегчити потщился еси первее, последи же противу мысленныя язвы безбожия и крамолы стал еси добре, во благоверии соблюдая стадо твое.

Епископства истиннаго образ был еси, страстей взыграния первее обуздав, на страже сердца твоего ум епископом поставил еси, темже и овцы Христовы ко пристанищу небурному мудре управил еси.

Богородичен: Надеждо ненадеемых, погибших обретение и заблуждающим обращение, Ты еси

Владычице Пречистая, ускори на помощь
отчаявшимся рабом Твоим.

Седален, глас 4:

Истины Христовы дерзновенна свидетеля, и
стада словеснаго пастыря мудра, предстоятеля
же Престолу Господню неусыпна, и во
страдальцех адаманта недвижима, воспоим
ныне, вернии, к мощем его тепле притекающе,
грехов оставления и еже от неправд наших
свобождения, сокрушенным сердцем
просяще. Дважды.

Слава, и ныне, Богородичен:

Странни и пришельцы во отечествии своем
быхом, и не имамы, где главу свою приклонити,
чуждии сотворихомся единоплеменником своим,
и ненавистни пленшим нас христорцем; Ты
же, Пречистая, бездомным едино прибежище, в
помощь ускори земнаго града zde не имущим,
яко да грядущаго града небеснаго, взыскав,
обрящем.

Песнь 4.

Ирмос: Ты моя крепость, Господи, Ты моя и
сила, Ты мой Бог, Ты мое радование, не оставль
недра Отча, и нашу нищету посетив. Тем с
пророком Аввакумом зову Ти: силе Твоей слава,
Человеколюбче.

Иверския земли украшение преславное явился еси, отче Владимире, служением пастырским подвигся, светом евангельским разноплеменные люди просвещая, и суеверия мглу далече отгоняя.

Ко граду первопрестольному возвращен промышленiem Божиим, просветитель отступльших поставляешися. О чудесе, о жалости исполнения! Како во Христа крестившиися века сего разумницы несмысленнее младенцев в вере обретахуся! Учении твоими обьуродевшия мирскою премудростию паки к Церкви Христовой приводиши, млеком евангельскаго словесе гладныя души питаеши.

Воистину ни един же от малых сих забвен бысть у тебе, блаженне Владимире, ко всем бо любви твоя распростресе, нищим, и простецем, и невеждам источник неоскудевающий Слова Божия отверзаеши.

Богородичен: Омрачение души моя просвети, Всесветлая Владычице, да поне напоследок житием добрым последую Сына Твоего глаголом Божественным, ихже языком праведным вещати навыкох.

Песнь 5.

Ирмос: Утреннююще вопием Ти, Господи, спаси ны, Ты бо еси Бог наш, разве Тебе иного не вемы.

Иереом образ был еси, святе Владимире, житием, словом и верою, ихже от предел земли Русския собрал еси, с нимиже воистину слава и украшение Церкви Московския был еси, с ними же купно и ныне Господу предстоиши.

Ангелом во смирении, апостолом в ревности, мучеником во исповедании истины поревновал еси, на пути став малодушествующих и отступников, к покаянию тех приводя, обличением кротким вразумляя заблуждшия. Ревностию Славы Божия снедаемъ, ко безумным глагола еси, яко клирицы власти царя земнаго, Богом благословеннаго, не чтуции, ниже Небесному верности сохранить возмогут, сего ради ко Престолу церковному приступити да не дерзнут.

Богородичен: Сокровище чистоты и девства благоухание Ты еси, Мати Божия Пречистая, отжени от нас малодушия греховнаго злосмрадие, и чистоту смысла поющим Тя даруй.

Песнь 6.

Ирмос: Ризу мне подаждь светлу, одеяйся светом яко ризою, многомилостиве Христе Боже наш. Еретичествующим и крамольником верою крепкою, святителю, противустал еси, паству твою от волков губительных оградити тщася, гнева злобующих никакоже убоялся еси, ниже осуждения человеческого.

Хранителя чистоты духовныя ты почитаем, Владимире священномучениче, духу бо прелести лукавыя пред лицом царевым противустал еси, лицепрятие и человекоугодие всеконечно отверг, истины ради Христовы.

Первее гнева самодержца не устрашился еси, последи же беззакония дерзновенно обличил еси, но ов убо кротостию увещание твое пастьрское послушаше, овии же, яко звери дивии на ты устремляхуся, темже светлость исповедания твоего отобоюду просия.

Богородичен: Едина чистая, Едина Всепетая, Едина во всех родех благословенная, Ты еси, Госпоже Премилостивая, приклони благоутробием ухо Твое ко въздыханием болезненным раб Твоих.

Кондак, глас 3:

В годину гонений лютых истинный Христов священнодействователь показался еси, первее

евангельское слово утверждая и Жертву безкровную Господеви принося, последи же с кровию твоею во святилище вшедый, священномучениче Владимире, моли Христа Бога, Церкви нашей единение подати, и отечеству от пленения христорборцев сохранитися, и душам нашим спасение улучшить.

Икос.

Днесь к честным твоим мощем притекающе, первомучениче в русских иерарсах, сокрушенным сердцем взываем к тебе с сострадальцем твоим Иоанном, пресвитером и певцем твоим надгробным: согрешихом паче ниневитян древних, покаянию тех не поревновавше, ты же со иными исповедники в жертву за грех сей избран от Господа был еси. Во всесожжение Божие не худородное, но паче дражайшее и любезнейшее Владыце приношати подобает, яко да умиление сердечное и оставление беззаконий падшии восприимем, и от пленения христорборцев сохранимся, и душам спасения улучшить сподобимся.

Песнь 7.

Ирмос: От Иудеи дошедше отроцы в Вавилоне иногда, верою Троическою пламень пещный попраша, поюще: отцев Боже, благословен еси.

Русския Церкви единения поборник твердый явился еси, отче Владимире, безумствующия малоросския раскольники вразумляя, да не мнят благих своих и свободы своея обрести в бедствиях Церкви, разделении терзаемья. Владимирове доблести вернии како не подивимся, духу бо века сего не поработився, и человеческим похотением не послужив, искушение демонское твердо отразил ешь, верность храня служению святительскому, еже о единении и благоустроении церковнем тщатися. Оставиша тя братия обители Печерския, долготерпеливе страдальче, о корыстех и вольнохождениих в похотех своих печася, волком лютым предаше пастыря своего, ты же кротостию и незлобием всех простил еси. Еже от человек помощи не имевый, тщанием в молитвах изрядным ко святым южнорусским прибегл еси, ихже предстательством небесным неразумным взывал еси от раскола престати и похотей ради своих Церкви Божия не губити. Богородичен: Пред Тобою, царице Всеблагая, припадающе, молим Тя, ходатайствуй к Сыну Твоему со Владимиром исповедником новым, да престанут и в нас раскольник шатания, и самосвятов прельщения и соблазны.

Песнь 8.

Ирмос: Царя Небеснаго, Егоже поют вои Ангельстии, хвалите и превозносите во вся веки. Отче свящennomучениче Владимире, кончину и страдание свое предзря, со умилением неседальное пение Пречистей Владычице приносил еси, во Успении Своем мира не оставльшей, темже и нас не остави бедствующиx грехми, венцем увязся от Господа нетленным во веки.

Юнцы тучнии одержаша тя, богоотступники и обетов священих презрителие, в ноци пояша тя и ведоша яко агнца на заколение, ты же пение надгробное пасхальное Агнцу Божию воспевая, Того стопам верно даже до смерти последовал еси, с Ним же и воцарился еси во веки.

Христово незлобие ко убийцем твоим простирая, тех благословил еси от Лица Господня, обаче словеси твоего добледушнаго не послушаша беззаконнии, единожды от веры отрекшися, неисправни пребыша на веки.

Воистинну победитель демонов и служителей их явился еси, Владимире славне, еже бо ко Христу тщания твоего запяти не возмогоша, всяку же заповедь Владычню исполнив дивным незлобием и верностию, страданием благодушным поприще твое скончаваеши на

земли, к невечернему свету отходиши на веки. Богородичен: Агнца и Пастыря на Кресте зряще повешена, с рыданием милость Того прославляеши и новых агнцев стада милостию Твоею покрывши, Тому последовати дерзающих приводиши, Агнице благословенная и Владычице, да с Ним воцарятся во веки.

Песнь 9.

Ирмос: Воистину Богородицу Тя исповедуем спасении Тобою, Дево Чистая, с безплотными лики Тя величающе.

Летом исполншимся, паки к пастве твоей мощами возвращаеши, благословение твоея десницы предсмертное и нам подаеши, яко да пути твоего последователи неотступнии явимся. Единовсельник преподобным Печерским не точию во славе Небесней явился еси, но и мощами цельбоносными с ними положился еси, воскресения грядущаго образ верным показуя, не престай убо, отче священнострадальче Владимире, купно с ними о нас ко Владыце молитися.

Низу преклоншимся, к земли прилепившимся, страстьми жития погруженным, возведение нам к небеси подаеши, аще токмо руце воздежем ко хвалению твоему, образом жития и страдания твоего умиляясь.

Истинныя славы взыскуя, Владимире, тленную и земную ни во что же вменил еси, темже и нам помози руце ослабленнии на молитву воздети, и очи горе возвести, да грядущаго во славе Господа бодренным сердцем усрящем, и славы Его причастницы будем.

Богородичен: Едина Надежда безнадежных, Владычице, ускори в помощь нашу, сокруши ожесточения сердец наших и помыслов возношение, се бо таковыми и толикими благодеянии и чудесы яже от Тебе и от мощей новых угодников Божиих доньне снабдеваемы, в нечувствии паки пребываем, близ грядущаго Суда Сына Твоего не боимся, и множества грехов своих не трепещем, но молитвами Твоими поне напоследок умиления слезы нам даруй.

Светилен:

Словом Евангельским человеки заблуждшия просвещая, того блистание внутрь приим, и страданием просветився, ко свету невечернему приходиши, но и сущим на земли просвещение даруй, отче священнострадальче.

Слава, и ныне:

Мати Света и Чертог Царев Ты еси, Владычице, неможение наше укрепи, пленение возврати,

омрачение же просвети, и мрак уныния отжени от вопиющих Ти похвальная.

На хвалитех стихиры, глас 6:

Не у исполнися обетование Божие о воскресении Руси Святыя на время краткое пред кончиною века, обаче покланяемся, вернии, мощем обретенным недавних страдальцев, исходатаивших нам время на покаяние и духовное востание и всего жития обновление, егоже причастники быти призывают нас. Не у исполнися священное прошение под небесным жертвенником вопиющих: вскую, Владыко, не отмстиши кровь нашу. Се бо милость, братия, велия: ускорим, потщимся на покаяние, подражающе вере русских новомучеников, от нихже Киевский Владимир трапезу духовную ныне предлагает нам, тоя причастники быти всех призывает. Не у исполнися до конца священное число новых страдальцев Русских, за веру Христову подвизающихся, темже дерзайте, о братие, на кончину взирающе славнаго Владимира, первосвятителя Киевскаго, се бо к нам мощми прииде ныне, победы своея славныя причастники быти призывая нас.

Слава, глас 8:

Не стужаемся ныне, о братие, зряще повсюду отступление от истины Христовы, паче же себе окаяваем, яко сего недуга причастницы, обаче на молитвы новомучеников уповающе, дерзновением ко источнику благодати приступим, се бо Владимир страдалец Киевский с Тихоном Патриархом исповедником к нам приидоста мощми многоцелебными, волю Божию о спасении нашем коемуждо от произволяющих возвестиста.

И ныне:

Владычице, прими молитвы раб Твоих:

Славословие великое. И отпуст.

На литургии

Блаженны, песнь 3-я на 4 и песнь 6-я на 4.
Прокимен, глас 7: Честна пред Господем смерть преподобных Его. Стих: Что воздам Господеву о всех, яже воздаде ми? Апостол ко евреем, зачало 334. Аллилуиа, глас 2: Священницы Твои облекутся в правду и преподобнии Твои возрадуются. Стих: Блажен муж, бояйся Господа, в заповедех Его восхощет зело. Евангелие от Иоанна, зачало 36.
Причастен: В память вечную будет праведник:

[Текст полиелейной службы на обретение мощей свщмч. Владимира Богоявленского воспроизводится (текстовым перенабором гражданским алфавитом) по «**Печерской Минее**» (т. 2, стр. 156 – 168)]

